

UVODNA RIJEČ UREDNIKA

Poštovani,

U Vašim rukama se nalazi ovogodišnji broj našeg i vašeg časopisa za pravnu teoriju i praksu „Pravo i pravda“.

Kao što ste već navikli, referati, radovi i članci objavljeni u ovom broju korenspondiraju sa temama koje će biti predmet izlaganja i rasprave na XIV savjetovanju iz krivičnopravne oblasti. Organizacioni odbor ovog savjetovanja je odlučio da se isto održi pod radnim naslovom „Procesuiranje organizovanog kriminala i korupcije i položaj pravosuđa u društvu“. Obe teme su aktuelne, te pored materijalno pravnih i procesnopravnih pitanja procesuiranja organizovanog kriminala i korupcije, zajedno sa Vama, smatramo da se ponovo treba aktuelizirati i pitanje položaja pravosuđa u društvu. Naime, svjedoci smo kontinuiranih kritika na račun pravosudne zajednice u Bosni i Hercegovini, pa čak i napada na nosioce pravosudnih funkcija koji zahtjevaju jasan i čvrst odgovor društva. Svakako da se trebamo potruditi da na još bolji način odgovorimo na opravdane zahtjeve za većom efikasnošću, na koji način ćemo najbolje odgovoriti na, moramo priznati, nekad i opravdane kritike.

Stoga smatram da će objavljeni radovi, a posebno oni koji budu izloženi na samom savjetovanju, biti dobra i kvalitetna polazna tačka za diskusiju.

Ove godine su prispjeli radovi po prvi put lektorisani, uz izuzetak rada gospođe Adise Zahiragić. Razlog za isto je zakašnjela dostava rada. U ovom broju, radovi se objavljuju u skladu sa dogovorenim okvirnim redoslijedom njihovog izlaganja na samom savjetovanju.

Izuzetno mi je drago što Vas mogu uputiti i na odjeljak „ostali članci“, gdje su objavljena četiri zanimljiva rada koja neće biti prezentirana na samom savjetovanju. To pokazuje da ste odgovorili na više puta upućivan poziv od strane uredništva časopisa za dostavu radova, referata ili članaka na teme koje ocijenjujete aktuelnim.

Uz želju da se i vidimo i čujemo na samom savjetovanju, poštovani čitaoci, u svoje lično i u ime uredništva toplo Vas pozdravljamo.

Glavni i odgovorni urednik/ca,
Aleksandra Martinović